

Frustracion pa cobamento den calichi na Mangel Halto ta keda sin respuesta

Fin di juli a surgi un situacion na Mangel Halto unda por a mira trabao di cobamento riba costa di Mangel Halto pa instala palapa. Mesora comunidad a bati alarma y a expresa nan frustracion pa loke nan a considera un otro proyecto cu ta kita di nos recursonan natural.

Bon Dia Aruba a reporta pa prome biaha tocante e situacion dia 23 di juli. Subsecuentemente, Aruba Conservation Foundation (ACF)—cual den colaboracion cu Aruba Tourism Authority (ATA) a lansa e proyecto aki—a ofrece nan banda di medaya riba e situacion na Mangel Halto y pakico a lansa e proyecto aki.

E organisacion a splica e tempo ey cu e situacion di bishitante na Mangel Halto ta poniendo mas presion riba e matanan di mangel, cual ta matanan protegi pa ley y ta forma un parti integral den naturalesa di nos isla.

A nota cu e aumento grandi di bishitante local y internacional na e area akinan a causa hopi daño na e mangelnan pasobra personanan tabata bay den e mangelnan pa asina busca sombra di solo, asina destrosando habitat di por ehempel e soldachi (Fiddler Crab), ta colga tasnan y serbete na e ramanan di e mangel, y ta laga atras mas sushi ainda den e raiznan di e mangelnan.

Pa motibo aki, e proyecto aki tabata enfoca principalmente na e renobacion di e palapanan y gazebonan na Mangel Halto como parti di un colaboracion primordialmente dirigi na reduci e impacto humano riba e sitio ecológicamente sensitivo akinan, y asina mancha bishitantenan activamente y crea espacio pa naturalesa.

Tambe e tabatin e meta pa renoba e palapanan deteriora riba lama y riba e costa, e brug, e trapi, y ultimamente e dek, den un manera cu ta mas alineada na metanan di conservacion y sostenibilidad a termino largo.

ACF a subraya cu e proyecto aki a pasa den comunicacion cu e comunidad bisindario—unda localidadnan di e palapanan a ser scogi cu sugerencia y den presencia di represent-

antenan di e comunidad—y a considera varios aspecto y medida pa por ehecuta e proyecto aki di manera mas sano pa hende y naturalesa. Pa cual ta e medidanan aki, ACF a clarifica lo siguiente:

- A reduci e number total di palapa, y no a bin cu mas palapa. Actualmente tin dos palapa menos cu loke tabatin prome.
- A kita e estructura redundantante. Esakinan ta resto di proyectonan bieu manera beton, trapi cu no ta ser usa y otro tipo di materialnan cu no tin funcion util mas.
- A realoca e palapanan pa areanan menos ecológicamente sensitivo: a kita palapa di area unda cu tin mata ta crece pa asina mester stop di corta e mata y laga vegetacion natural pa regenera, trahando mas espacio pa naturalesa.

• A realoca e palapanan riba costa mas leu di e liña di costa pa reduci e chens cu sushi ta cay di biaha den lama.

• A restaura habitat costero door di crea mas espacio na e costa pa especienan costal manera e Sternchi of Bubi por unaves mas cuminsa usa e costa pa broei den futuro. Por observa caba Sternchinan den e area.

• A diseña e palapanan cu un fundeshi fuerte y solido pa por wanta e biento costero fuerte y asina garantiza e siguridad di bishitantenan, mientras a incorpora cu e parti ariba di e palapa por facilmente ser manteni sin mester atrobe stroba e fundeshi of e naturalesa cu ta rond di e palapa.

Aunke sigur a duna mas clarificacion riba e proyecto, ainda a keda par pregunta cu te ainda no a haya contesta. Bon Dia Aruba a acerca ACF cu e preguntanan aki, incluyendo tocante e cobamento den calichi. Den e edicion aki nos kier a tuma e oportunidad pa profundisa un poco mas riba nos preguntanan tocante e situacion actual.

Despues di a publica ACF su respuesta siman pasa, por a nota cu en general lectornan tabata insatisfecho cu loke ACF tin di bisa tocante e situacion, ya cu esaki no a atende e frustracion principal cu pueblo tabatin pa cu e proyecto aki, esta e cobamento den calichi.

Manera un usuario a nota: “E punto tabata cu ta usa heavy equipment ribe baranca. Ba-



ranca no ta solid, cu impacto por hasi mas danjo cu bon. Si waak bon na rand di baranca tin pida ta los cu tempo for di costa. E impacto di machine por hasi e area rond zwak. E problema no ta e palapa ariba su mes, si e manera cu kier construi fundeshi.”

Nos prome pregunta tabata dirigi precisamente riba e preocupacion aki. Manera a menciona den nos edicionnan anterior tocante e tema aki, e suelo di calichi cu tin riba costa di Mangel Halto ta fragil y construcion continuo riba dje por crea un situacion peligroso pa bishitantenan di e playa, por ehempel si e bira demasiado zwak y kibra cay.

Esaki no ta un preocupacion sin base, ya cu nos a mira caba un incidente unda un pida di e costa a cay den lama. Ademá, den un video publica riba Facebook, por a mira cu e cobamento di calichi a laga algun crack den suelo.

Bon Dia Aruba a trece e puntanan aki dilanti cerca ACF, unda a puntra pa verificacion si en berdad tin un riesgo pa e estabilidad di e suelo si pone mucho presion riba e calichi. Ademá a puntra ki sorto di riesgo esaki por trece na e bishitantenan mes cu ta biba na den e area, ya cu tambe a mira algun usuario bisa cu e cracknan aki por stroba e fundeshi di casnan situa na banda.

Un otro pregunta cu nos tabatin ta encera e ehecucion di e fase aki di e proyecto.

Manera ACF a menciona den nan comunicado, e proyecto aki ta un colaboracion financiamiento pa ATA y mancha pa un empresa di ingenieria contrata, cual a surgi via Facebook di ta JEB Construction Aruba.

Bon Dia Aruba a manda pregunta di den ki manera e partidonan involvi ta sigurando cu esnan ehecutando e trabao ta tumando cuido pa preveni (mas) destruccion. E pregunta aki ta bin pa via di algun reaccion riba red social tocante e cobamento den calichi, pero tambe pa via di e daño cu esaki ta causando pa e naturalesa cu ta rondona.

A nota den un video publica pa activista Nigel Maduro raiznan den tera kibra y al menos un mata di kwihi destrui pa via di e uso di heavy equipment.

Ta parece cu a pesar di tin e intencion di protege naturalesa, e proyecto aki a resulta den otro tipo di destruccion, cual ta laga di puntra kico ta e sentido si no por sigura cu e trabao no ta crea mas of otro tipo di problema? Ki sorto di vigilancia of control por ser implementa pa situacionnan asina no pasa?

E renobacion na Mangel Halto a cuminsa na november 2022 como parti di un proyecto multi anual, cual a surgi principalmente pa via di casonan di vandalismo di palapa cu a tuma luga. E tempo ey, ex-minister di Turismo Dangui Oduber a menciona

cu a pidi pa cooperacion di Cuerpo Policial (of KPA) pa vigila. Cu esaki ta bin e pregunta si KPA tambe por hunga un rol pa vigila con trabonan di construcion ta cana, specialmente den areanan publico y ecológicamente sensitivo.

Den nan respuesta pa e situacion na Mangel Halto, ACF a enfatisa cu ta conta riba e comunidad di Aruba pa ta e wowo y e orecnan di naturalesa y avisa di cualkier problema na momento cu e ta pasando. Y aunke esaki ta berdad, mester menciona tambe cu autoridadnan tambe tin, of tin mas responsabilidad pa sigura cu problemanan no surgen.

Nos ta manda e preguntanan aki pa no solamente ACF pero sino na tur instancianan involvi y ademá pa e autoridadnan riba nos isla.

Ta birando cla cu perspectiva publico ta cambiando pa loke ta e tipo di proyectonan aki y por mira cu tin un demanda creciente pa no solamente transparencia sino tambe accion adecua y control for di esnan cu mas experticio y mas responsable pa e maneho di nos areanan stima.

Bon Dia Aruba lo keda atento na cualkier reaccion of contesta y lo sigui brinda nos lectornan mas informacion.